

**Angutit arnallu naligiissitaanerat pillugu Inatsisartut inatsisissaatut siunnersuut**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

**Saqqummiineq****Siullermeerinnineq**

Arnat angutillu naligiissitaanerat pillugu Inatsisartut inatsisissaatut siunnersuut Naalakkersuisut sinnerlugit matumuuna saqqummiuppara.

Inatsisissatut siunnersuut pingaartumik suliniutinik allannguutinillu ukuningga imaqarpoq:

- Naligiissitaaneq pillugu inatsisit inatsimmi ataatsimi katersorneqarnerat.
- Siulersuisuni, ataatsimiitaliani il.il. arnat angutillu amerlassusissaannik ilanngussineq.
- Suliffeqarfiit pisortallu nalunaaruteqartussaataanerannik erseqqissaaneq.
- Naligiissitaaneq pillugu Siunnersuisoqatigiit ilaasortaasa katiterneqarnerisa allanngortinnera.
- Naligiissitaaneq pillugu Siunnersuisoqatigiit suliassaannik erseqqissaaneq.
- Arnanik angutinilluunniit peqqusiileqisitsinerit kinguaassiuutitigulluunniit peqqusiileqisitsinerit inerteqqutaanerannik ilanngussineq.
- Pissutissaqanngitsumik soraarsitsinerimi taarsiivigineqarnissap qaffasinnerpaaffiata peerneqarnissaa.

Aalajangigassatut siunnersuutit marluk (UKA 2010/42 aamma UKA 2011/19) Inatsisartuni suliarineqartut siunnersuummi tunuliaqutaapput. Taakkunani pineqarpoq naligiissitaaneq pillugu inatsisip atuutilersinneqarnissaa aammalu siulersuisunut, sinniisoqarfinnut imaluunniit ataatsimoorussamik aqutsisoqatigiinnut assigisaannut sinniisussanik toqqaanermi arnat angutillugu assigiimmik agguataarnissaat.

Inatsisissatut siunnersuut Naligiissitaaneq pillugu Siunnersuisoqatigiit ataavartumik peqataatittarnerisigut suliarineqarpoq.

Siunnersuummi aallaaviuvoq immikkoortuni tamani arnat angutillu naligiissitaanerisa annertusarnissaa, tassunga ilanngullugit arnanik assigiinngisitsinerit tamarmik atorunnaarsinneqarnissaat pillugit FN-imi isumaqatigiissutip (isumaqatigiissut CEDAW) atuutilersinerata annertusarnissaa aamma FN-imi Committee on the Elimination of Discrimination against Women-imi inassuteqaatit pingaarnerit malinneqarnissaat. Siulersuisuni, ataatsimiitaliani il.il. arnat angutillu amerlassusissaannik ilanngussinerimi

aamma suliffeqarfiit naligiissitaaneq pillugu politikii sulisullu suaassutsikkut katitigaanerat pillugit suliffeqarfiit pisortallu nalunaaruteqartussaataanerisigut malinneqarpoq.

Siunnersuummi immikkoortut pingaernerit ilaat uani erseqqissassavakka.

Inuussutissarsiutini suliffeqarnermilu arnat angutillu naligiimmik sunniuteqarnissamut peqataanissamullu periarfissaasa qulakkeerneqarnissaat siunnersuummi pingaartinneqarpoq. Naligiissitaanerup annertusarnissaa aamma aqutsinerni aalajangiisarnernilu asigiinnigiaartumik ingerlatsisarnerup siuarsarneratigut inuiaqatigiinni ineriartortitsinissaq kissaatigineqarpoq, tassunga ilanngullugit suaassutsit pisarnertut qissimigaarnagit inuiaqatigiinni piginnaasallit tamarmik annertunerusumik isiginiarneqarnissaat. Taamaalilluta suaassuseq apeqqutaatinnagu inuussutissarsiutini peqataanissamut periarfissat qulakkiissavagut.

Peqqusiileqisitsineq kinguaassiuutitigulluunniit peqqusiileqisitsineq inerteqqutaapput. Ilaasa tupaallaatigisinnaavaat. Kisiannili ajornartorsiutaasoq paasinarsinikuuvoq, tamannalu tusagassiuutini akuttunngitsumik aamma saqqummiunneqartarnikuuvoq. Kalaallit Nunaat siusinnerusukkut kinguaassiuutitigut peqqusiileqisitsisarneq pillugu aalajangersimasumik inerteqquteqarnikuunnigilaq – taamaammat tamannarpiaq inatsimmi uani ilanngupparput. Inerteqquteqarnerup ilaatigut kinguneraa suliffeqarfimmi peqqusiileqisinneqarsimagaanni kinguaassiuutitigulluunniit peqqusiileqisinneqarsimagaanni taarsiivigineqartoqarsinnaanera.

Aammattaaq Kalaallit Nunaanni Naligiissitaanermut Siunnersuisoqatigiit suliassaasa allanngortinnerisigut innuttaasut naligiissitaaneq pillugu paasissutissanik ujarlernissaat ajornannginnerulersinneqassaaq, tassa inatsit malillugu innuttaasut saaffiginninnissamik aalajangersimasumik periarfissaqassammata. Tamanna inatsisissatut siunnersuutip kingunerisaanik pisinnaatitaaffiit pillugit ilisimasaqartitsinerulissaaq.

Siunnersuut ataatsimut isigalugu naligiissitaanermi pitsaasumik ineriartortitsinissamik qulakkeerinntsitsisussaq Naalakkersuisut matumuuna saqqummiuppat.

Taamatut naatsumik oqaasertalerlugu siunnersuut Inatsisartunut suliassanngortinneqarpoq.